



Bosnia and Herzegovina
Federation of Bosnia and Herzegovina

CANTON SARAJEVO
**Ministry of Physical Planning Construction and
Environmental Protection**

Broj:05-05-3581-78/19 III MG
Sarajevo,03.04.2019.godine

SKUPŠTINA KANTONA SARAJEVO
n/r Elmedin Konaković, predsjedatelj
- ovdje -

PREDMET: Odgovor na zastupničko pitanje zastupnika Vibora Handžića

Zastupnik Vibor Handžić na Petoj radnoj sjednici Skupštine Kantona Sarajevo, održanoj dana 27.02.2019.godine, u okviru tačke Dnevnog reda „Poslanička/zastupnička pitanja, inicijative i odgovori“, a u skladu sa Poslovníkom Skupštine Kantona Sarajevo, postavio je zastupničko pitanje:

U kojoj fazi je već započeti projekat “Uvođenja odvojenog prikupljanja otpada u individualnim stambenim objektima na području Kantona Sarajevo”, te ukoliko još traje, kada će se nastaviti navedene aktivnosti i da li je moguće proširiti navedeni projekat, obzirom da se u praksi pokazao kao vrlo efikasan.

Obrazloženje:

Radi se o projektu koji je započeo 2017.godine kada je najavljeno da će čak 1500 domaćinstava u KS dobiti žute i crne kante za odvajanje otpada u obliku suhe i mokre frakcije. Zanima me koliko je domaćinstava dobilo kante i u kojim se naseljima nalaze, te da li projekat obuhvaća sve općine u Kantonu Sarajevo?

Također podnosim inicijativu da se započne nova faza realizacije projekta koja će uključivati dodjelu pomenutih kanti domaćinstvima u naseljima u kojima su locirane divlje deponije. Inicijativu podnosim jer se u drugim općinama ova mjera pokazala kao efikasna, nakon što su



dodijeljene kante domaćinstvima u naseljima u kojima su postojale divlje deponije, nakon kratkog vremena deponija više nije bilo, jer u ovim naseljima više nisu bili potrebni kontejneri niti druga odlagališta otpada (primjer: rješavanje divljih deponija u naseljima Nedžarići i Saraj Polje u općini Novi Grad Sarajevo).

ODGOVOR:

Planom upravljanja otpadom Kantona Sarajevo za period 2015-2020.godina, koji je donijela Skupština Kantona Sarajevo 21.07.2015.godine ("Službene novine Kantona Sarajevo" broj 29/15), utvrđen je generalni cilj upravljanja otpadom u Kantonu Sarajevo, a to je primarno selektiranje i iskorištavanje otpada.

U toj funkciji, pripremljen je projekat "Izrada općinskih elaborata o lokacijama reciklažnih dvorišta, niša i zelenih otoka u svim općinama Kantona Sarajevo, sa lociranjem u prostorno-planskoj dokumentaciji i investicijskim planom", koji realizuje Zavod za planiranje razvoja Kantona Sarajevo, na inicijativu ovog Ministarstva, a elaborati će uskoro biti predloženi za usvajanje Vladi Kantona Sarajevo. Elaborati su obuhvatili broj, vrste i lokacije infrastrukture za odvojeno prikupljanje otpada, kao i procjenu potrebnih sredstava.

Planom upravljanja otpadom, kao i općinskim elaboratima, je predviđena nabavka i podjela posuda za odvojeno prikupljanje PET ambalaže i papira u naseljima sa individualnim stanovanjem. Projektom su obuhvaćene sve općine Kantona Sarajevo. Koncept tzv. dvolinijskog sistema se bazira na odvajanju suhih frakcija iskoristivog otpada od mokre frakcije. Pod suhom frakcijom podrazumijeva se ambalažni otpad, odnosno staklo, papir, karton, plastika i metalna ambalaža. Sav ostali pomiješani otpad je mokra frakcija. U ovisnosti o mogućnosti pristupa i tipovima objekata, uvode se parovi kontejnera za više domaćinstava (2x 1100 l) ili duple kante za individualna domaćinstva (2x120 l ili 2x240 l).

Da bi se projekat uspješno realizovao, neophodno je da ga prati i usaglašavanje regulative za komunalni otpad, kao i izbor adekvatnog tarifnog modela za komunalni otpad, kako bi se omogućila naplata otpada po količini, odnosno zapremini posude.

Projekat odvojenog prikupljanja otpada u individualnim stambenim objektima na području Kantona Sarajevo izradio je KJKP "Rad" u augustu 2016.godine. Na poziciji Ministarstva izdvojena su sredstva za realizaciju faze I projekta, kojim je nabavljeno 3.000 posuda od 120 l, kao i 140 kontejnera od 1100 l, koji su podijeljeni u naseljima sa individualnim stanovanjem. Takođe, u cilju smanjenja otpada na deponiji, te iskorištenja organskog otpada iz domaćinstava, projektom je podijeljeno 45 kompostera fizičkim licima koja planiraju kompostirati svoj organski otpad. Projektom je predviđeno uvođenje dvolinijskog sistema podjelom kanti u individualnim stambenim objektima u općinama Stari Grad, Centar, Novo Sarajevo, Novi Grad, Ilidža i Vogošća, dok je zbog poteškoća uvođenja ovog sistema (udaljenost od odlagališta, te visoki transportni troškovi), u općinama Trnovo, Ilijaš i Hadžići, predviđeno je uvođenje dvolinijskog sistema putem kontejnera, a Općina Ilijaš je dodatno finansirala nabavku 400 posuda od 120 l. U okviru projekta je



web: <http://mpz.ks.gov.ba>
e-mail: mpz@mpz.ks.gov.ba
Tel: + 387 (0) 33 562-029,
Fax: + 387 (0) 33 562-031
Sarajevo, Reisa Džemaludina Čauševića 1




organizovana i edukacijska i medijska promocija projekta, kako bi se građanima ukazalo na važnost odvojenog prikupljanja otpada. Projekat se pokazao kao izuzetno dobar u smislu rješavanja problema lokacija za kontejnere koji se nalaze unutar naselja sa individualnim stambenim objektima, a i u smislu odvajanja otpada na mjestu nastanka i njegovog recikliranja umjesto odlaganja.

S obzirom na značajne pozitivne rezultate I faze projekta, izdvojena su dodatna sredstva za fazu II, za nabavku 3000 kanti od 240 l, te nabavku jednog vozila za prikupljanje otpada za reciklažu. Faza II projekta je završena do polovine 2018.godine.

U toku je realizacija faze III projekta, koja se odnosi na nabavku 1000 kanti od 240 l i 1000 kanti od 120 l, te na nabavku i ugradnju opreme za sortiranje miješanog komunalnog otpada u sortirnici u okviru RCUO Smiljevići, budući da je postojeća sortirnica na RCUO Smiljevići trenutno osposobljena samo za sortiranje odvojeno prikupljenog otpada iz reciklažnih kontejnera, odnosno suhe frakcije komunalnog otpada.

Smatramo korisnom inicijativu za dodjelu kanti domaćinstvima u naseljima u kojima su locirane divlje deponije, a istu ćemo predložiti za realizaciju kroz naredne faze projekta.



MINISTAR

Damir Filipović, MA prava

Obradila: Mira Grgić,
stručni savjetnik za upravljanje otpadom

Kontrolisala: Zijada Krvavac,
pomoćnik ministra za zaštitu okoliša

Dostaviti:

- Naslovu
- Vlada Kantona Sarajevo
- Evidencija
- a/a



web: <http://mpz.ks.gov.ba>
e-mail: mpz@mpz.ks.gov.ba
Tel: + 387 (0) 33 562-029,
Fax: + 387 (0) 33 562-031
Sarajevo, Reisa Džemaludina Čauševića 1



Handwritten text, possibly a signature or date, located in the middle-left area of the page.